



QVÆSTIO MEDICA.

QVODLIBETARIIS DISPV TATIONIBVS

MANE DISCV TIENDA

IN SCHOLIS MEDICORVM,

die Iouis IV. Ianuarij.

M. PETRO BOVRDELOT,
Abbate Massænsi, Doctore, Serenissimæ Regine
Sueciæ Medico primario, Moderatore.

An qui sunt habitu raro sint viuaciores?

I.

VITA, quæ est permansio calidi in humido,
triplex pro viuentium triplici genere consti-
tuitur: hæc sunt planta, brutum, homo. Plantæ diu-
turna vita, hominis & bruti breuior: illius insitus ca-
lor penè fatis à se ipso fouetur, horum perennis efflu-
xus, quâ refarciatur indiget materiâ. Vitæ breuitas,
vel longitudo à constitutione caloris & humidi maxi-
mè pendent. Ea vitæ principia quo vberiora, cò cœli-
cius & longiùs vita extenditur, potissimum si simul
aëreum, glutinosum, & purum sit humidum natiuum:

A

secus verò misera viuentis fors, si vitæ calamitas à breuitate æstimetur. Quicquid autem in fabrica corporis occurrit, calorem præcipuum nouit opificem, à quo & peculiari subiecti dispositione habet corpus, quò sit rarum, & ad expellendas injurias quas internum disfidium excitat, conuenientissimum.

II

DIVTURNITATEM vitæ, quam omnes in votis habent, tuentur multa, plura destruunt: tuentur præcipuè ventilatio caloris & expulsio fuliginum, quæ si desint, qui feruet ignis in sinistro cordis specu torreret omnia; sed aër affluens assiduè (cujus beneficio nec ipsæ mulieres hystericæ destituuntur) refrigerat æstuantem illum & fœlici discordiâ fouet: fuliginum expulsio quanti momenti sit, motus cordis significat & quæ per rarum totius corporis habitum fit perspiratio; si non tam euident, maximum tamen est sanitatis subsidium. Si verò densior sit habitus, ambientis injurias faciliùs quidem ferunt, sed internas vix possunt sustinere.

III.

CALOR natiuus elementaris naturæ, ex semine aëreo & spumoso inducit habitum rarum, in extima cute maximè conspicuum, quæ rarior dum est densiori præcellit, vt non modò tactu subtilior, sed firmiorem constitutionem, cujus est indicium, ab omnibus præstet injurijs securiorem. Hæc mediam inter carnem nervumque naturam adepta, temperatissima est, per illius insensibiles meatus fit ea, quæ sola pluribus sufficit ad vitam animalibus, caloris ven-

tilatio (transpirationem vocant) quam plurimum juuat jugis ille motus arteriarum. Per eosdem videbis fuliginem exeuntem, vt vaporem fumosum. Omnia in habitu raro manifesta, per patentes cutis poros facilis aditus aëri & egressus fuligini; ille calorem alendo, ista eundem repurgando diu retinent & conseruant.

IV.

LONGÆVITATEM fato concessam pluribus, laudabili principiorum forte obfirmatam, morborum iniquitas fato superior sæpe præcindit: denegatam in ortu primo, fœlix ac diligens vitæ ratio nonnunquam prorogat. Hæc ab internis vel externis morborum causis impetitur, ita tamen, vt quibus negotium est foris, habeant domi quo sibi plaudant, hostemque vt admittunt facilè, sic minori negotio expellunt.

V.

DENSIOR habitus vitæ compendium est & ad interitum præceps; ab eo fere omnis morborum illuuius. Sanguis, si copia peccet, grauiam infert detrimenta; vix noceret si diffilaretur: putredo vitæ fundamenta quatit, transpirationis libertas irritum facit illius maleficiū: caloris oppressio naturæ opera inturbat: vegetiora fient, si gementem sub pondere vnâ ventilatione leuaueris: diariam sine periculo medicina non jactitat, vbi vaporibus est præclusus aditus: aliénos hostes reformidat natura, domesticos vix persentiscit, dum illorū impetus vel frangit, vel eludit patente publicâ viâ: calidi & hu-

midi fœliciores audiunt, non ab ingenio, quo cedunt melancholicis, sed diuturnitate vitæ quam debent transpirationi: frigidi & sicci senescunt ante senectutem; vix adolefcunt, cum exiguus qui illis inest spiritus, non spirat. Homini nihil tam metuendum quàm à se ipso; incauta viuendi ratio naturæ destruit dotes, habitum corporis mutat in contrarium & vltimam vitæ lineam facit, quæ vix media futura erat. Fœlicior illorum conditio qui habitum rarum quem contraxerunt ab ortu, tuentur diuque illius beneficio vitam producant.

Ergo qui sunt habitu raro sunt viuaciores.

DOMINI DOCTORES DISPUTAVRI.

<i>M. Antonius Ioannes Morand.</i>	<i>M. Egidius le Bel.</i>	<i>M. Florimundus Langlois.</i>
<i>M. Michaël Denyau.</i>	<i>M. Abrahamus Thuart.</i>	<i>M. Franciscus Pajot.</i>
<i>M. Claudius de Frades.</i>	<i>M. Nicolaus Lienard.</i>	<i>M. Tuffanus Fontaine.</i>

Proponebat Lutetiæ GASPAR MAVRIN,
Annotensis, A. R. S. H. M. DC. LXIII.

PARISIIS,

Apud FRANCISCUM MUGVET, Typographum
Regium, viâ Citharæ, ad insigne trium Regum.

M. DC. LXIII.